

四庫全書

集部

欽定四庫全書

江湖後集卷十四

宋 陳起 撰

程炎子

炎子字清臣宣城人有玉塘烟水集按寧國府志載程炎水西寺詩云炎涇縣隱士有烟水集應即炎子而志誤脫子字也

餞周東巖之石門訪汾陽氏并呈友人

漫浪江湖脚周遊到石門能延徐孺子知有令公孫詁

雨燈輝座醻春酒濫樽况逢朋友在一見必溫存

四安舟中

多行三兩日猶在四安舟天正當寒夜人偏作遠遊風
高雲葉動江闊浪花浮會得幽閒趣唯應是白鷗

山中雜詩

側耳橋邊聽聲聲在翠微自甘留此坐何苦勸人歸院
悄驚春晝山空戀夕暉得如鷗與鷺對我欲忘機

崑崙初鑿破大巧奪天真竹鎖三更月桃酣幾度春山

空聞鶴唳溪遠卜鷗鄰為拂留題石松搖露滴身

登高感興

破帽西風裏龍山憶孟嘉白衣誰送酒黃菊自開花塞遠書傳鴈天昏墨點鴉憑高窮北望何處是中華

次郡太守劉朔齋秋晚謁謝昭亭小飲三首

鞭搖五馬踏沙隄秋晚除書下紫泥蘚壁篆碑猿捧硯
松闕唶句鵠分題裴休故宅今為寺謝朓閑官昔仕齊
太守宴歸賓客從數聲山鳥日平西

一禱心香雨便晴萬家和氣釀成醺時方入到昭亭路
風已吹開疊嶂雲詰向禪中參冷淡心於靜處息紛紜
麥畦邂逅長沮語想徹黃堂亦喜聞

掀髯一笑倚危闌面面青山不厭看霜染丹楓秋色絢
日烘紫菊露痕乾鵠爐火慢熏龍腦蟹眼湯新淪鳳團
回簇絳紗城郭晚老梅吹角鴈拖寒

題如庵

脫畧機闕一散人清於蘭畹抱幽馨撫松細嚼淵明句

淪茗閑簾陸羽經春對風光秋對月曉觀雲氣夜觀星
世間局面多翻覆着數雖高亦懶聽

暮春

花飛簷雨恰經旬強半韶華斷送頻三月便晴三十日
一年只有一分春酒甘不飲心如醉詩苦耽吟味越真
欹枕北窓清夢覺落紅啼鳥伴幽人

古梅

水邊山腳友漁樵梅欲窺人故故招樹剥龍鱗黏碧蘚

枝翹鶴膝粉紅椒詩如老杜吟東閣夢約逋仙過斷橋
好待月窓清影瘦傳他神子上生絹

蠟梅

畫樓人醉燭高燒滴在寒枝蠟未消藥撒打鶯金彈滑
花懸驅雀綵鈴搖歌兒戲拍供檀板妝女輕裁貼翠翹
酒揭黃封詩嚼淡時勻乳蜜過山腰

水樂洞

南山水樂洞窈窕白雲深滿耳笙歌者誰能一洗心

歸日

去時雪學楊花舞
歸日花如雪樣飛
何事楊花并雪絮
送人西邁送人歸

登新安五嶺

五嶺崎嶇一步難
白雲蒹霧幕中間
行人莫道山多險
更有人心險似山

天台陳山夫寄別用韻

斷烟荒草共幽幽
斜雨拋絲織晚愁
鷗鳥似知人乍別

飛來飛去渡船頭

劉植

植字成道永嘉人安上曾孫有漁屋集

送周知丞之官桐廬

潮滿桐江上秋風洗印時
字民知最近占位莫嫌卑紙
尾書名大松邊得句遲定懷東閣老無復寄來詩

梅

欲問孤山訊蹇驢行曉晴一枝籬外見數點雪中明太

潔難為友群芳讓作兄何如伴高隱豈必盡調羹

送周子餘赴松陽簿

長松雖劇縣主簿却優閑溪淺清見石齋空靜對山吏
嚚嫌訟省鄉狹覺民艱獨稱詩人意行吟苔竹間

琵琶亭下問舟

西亭問津處白傅此曾遊無復錦絃曲空停估客舟拋
江春浪靜傳柝夜烽收最愛廬峰峭相隨過別州

重遊仙巖觀瀑

四山雲霧重况復值梅天澑注玉函碧派從銀漢連飛
來三百尺流潤幾千年仙者路安在翠蘿青靄邊

送西外趙知宗

三山蓬闊近賀白是仙才去領宗盟事知從韋素來幾
人留北闕獨棹向南臺踏雨江頭別西陵潮已迴

題王憲使滄浪閣

城池浸空碧鑒影復觀心孺子去何在此歌傳至今一
奩涼月白萬井市聲沉坎止寧勞問憑欄意獨深

過彭澤

井邑已非舊柴桑里尚存春風三畝宅落日數家村隔
樹聞鷄犬編氓半子孫頹然孤壠在寒菊繞松根

漁父

生不事農耕悠然一舸輕沅湘依舊綠秦漢幾回更晚
膾雜香薩夜醺歌濯纓豈同馳騖者祇欲釣虛名

種玉亭為黃元信賦

鉏偏蒼苔色梅花近地移山深藏羨璞春到長新枝草

木初分潤冰霜久結知百年封殖在終與鼎驚期

賦鮆魚得真字

寒碧湛無塵前溪得細鱗香堪配杞菊味不數菰蓴玉露雙釅熟秋風一筯新釣緡吾自有何用覓玄真

丙午普覺看梅

寂寂西巖寺何人訪靜來重尋舊遊地惟有道師梅樹蠹應留雪香清不受埃可堪玄鬢改春已隔年催

呈葉先生侍郎

位雖奎閣貴獨處一齋空還以經綸事全歸著述中閑
心同野水煦物盡春風掩面將何向西楹奠已終

喜曹東畎遷大理寺簿

九衢多雨後庭下草痕新終擬持平手來為折檻人印
開桐蔭午吟久燭花春却恨無來客分題寄所親

嘉禾興聖院

禪關自幽閒竹亦號真如況是龍潛地曾經鳳食餘土
深抱節密林淨著行蹟誰謂乾淳達清陰只似初

重遊法空寺

寺在方山頂山深不厭登瀑飛明月峽橋渡夕陽僧萬法元皆妄餘生了未能纍纍塔邊塚幾見谷為陵

悼盧次元

屈賈幽沉地單車去不歸湘江清見底吟魄遠何依行
旆衝殘雨新楸掩落暉誰收遺篋藁有子未勝衣

失題

此是夕郎宅曾經左緯吟數聯漁父曲萬頃碧波心月

上白蘋渚秋生古樹陰當年濯纓處清徹到如今

荅東閣

蓋乏儲空謾自豪掬泉當酒味尤高賣文近覺馬卿倦
脫贈今無范叔袍松下耕樵相爾汝人間膏火自煎熬
荆山山裡山如壁壁罅猶堪種碧桃

省梅呈同遊東閣清源

此樹何年向此栽孤根低倚佛樓臺不嫌幽壑逢春晚
獨在空庭立雪來一段精神肪玉潤數松掩映翠屏開

知心藉爾歲寒友每到花邊不忍回

靜樂趙觀文挽詞

大星殞地寂無光硯席凝塵閟野堂一老海濱天下愁
百年江左恨空長家傳遺藁歸中秘帝錄元勲紀太常
路遠生芻來未得淚乾門下老劉郎

題薛氏園

屋頭深鎖嶼頭雲高下亭臺景旋分荷氣曉來迎露省
泉聲雨後隔溪聞踈櫺不礙松蘿月高柳時停鷗鷺羣

祗恐此身閑未得徵書催發暑如焚

文會飛霞觀

水滿平川月滿船
船輕撐入藕花邊
移來謝守巖前坐
疑是容成洞裏仙
茶竈烟遮松際
鶴絲桐聲雜樹頭
蟬明朝更踐彌明約
句擬當年石鼎聯

潯陽江樓

樓壓潯陽地
望雄四無倚
着柱晴空九支江
匯欄干外雙劍峯
明霧靄中便令聲名猶
昨日屈平蘭芷又薰風

綢繆牖戶知何計須及長淮棗未紅

張紹文

紹文字庶成南徐人

雲溪叔父賜飲大梅花下以蹤影橫斜暗香浮

動分韻得動字

清溝洞寒波怪石亂扶擁輕風捲濃雲天際孤月湧主
人宴親賓會合意彌重列炬照寒梅繁星粲脩隴清香
逼詩魂吟興欲飛動酩酊歸去來嚴城角三弄

鍾山路間

立馬鍾山路斜陽鎖亂峯
斷碑生綠蘚古道立青松
春事梅邊覺鄉愁酒後濃
興亡多感慨我輩復情鍾

自維揚辭親暫歸里中登樓有作

爛漫家山景物妍西風收拾下
蠻牋半分寒事梅花裏
一段幽懷夕照邊漁唱淒涼招野色
鴈行縹緲帶晴烟
淮山只在欄干北目送飛雲重黯然

自淮陽還里中抵舍一夕即為通川之行

喜得歸來席未安又携書劍上江干莫陪親戚話情慾
空指溪山說肺肝客路幾程來杳杳天涯一棹去漫漫
故鄉又被江雲隔寫得詩成欲寄難

小院

小院春寒閉寂寥東風吹雪未全消山茶謝了梅花落
移得詩情上柳條

醉鄉

醉鄉詩筆是生涯短短蠻牋字字斜沉水一株烟未斷

半窓寒月上梅花

醉江月

淮城感興

舉杯呼月問神京何在淮山隱隱撫劒頻省勲業事惟
有孤忠挺挺宮闈荒涼衣冠淪沒天地憑誰整一枰碁
壞救時著數宜緊雖是幕府文書玉閣烽火暫送平
安信滿地干戈猶未戢畢竟中原誰定便欲凌空飄然
直上拂拭山河影倚風長嘯夜深霜露淒冷

水龍吟

春晚

日遲風軟花香困人天氣情懷懶牡丹謝了酴醿開後
紅稀綠暗慵下粧樓倦臨鸞鏡粉輕脂淡嘆韶華迤邐
將春歸去沉思處空腸斷長是愁蛾不展詰春心只
憑雙燕良辰美景可堪虛負登臨心眼鴈杳魚沉信音
難託水遙山遠但無言倚遍欄干十二對芳天晚

壺中天

為兄峯雲水月主人壽

丹臺仙伯記蹤跡當年瓊樓金闕底事來遊人世界為
愛峯雲水月結屋南園境隨人勝不是溪山別今朝初
度碧蓮千頃齊發况是駕侶新諧鳳離纔長占人間
歡悅且盡壺天終夕醉聽取妙歌千闋待得西風鶲書
飛上更復青禮物功成名遂赤松還伴高潔

沁園春

為叔父雲溪主人壽

數遍時賢誰似雲溪未老得閑自抽身州縣歸休舊隱
灰心名利跳出塵寰卸却朝衣笑拈拄杖日在花陰竹
徑間身輕健任高眠晏起渴飲飢餐垂弧猛省當年
且約住春風開壽筵況園亭池館新竒佳麗弟兄姪
歌笑團欒綠鬢朱顏綸巾羽扇做箇人間長壽仙霞觴
舉願年年今日長對南山

章采

采臨江人

搖搖花行

搖搖花長安城南道小草欣欣造物勻三月來來野田
好女郎厭踏王孫園出郊更覺春嫣然五家蹙成錦繡
谷雙鬟妙舞玳瑁筵合歡扇裁七寶月蔭步蓋簇空青
天分司自訟狂驚坐拾遺勸我莫近前此時搖搖絕低
小媚紫得映車間鋗幸承踏歌羅襪煙偶荷細摘春心
憐豈如黃土岡頭古柟樹花開花落無人覩一枝折頓
固弗班五陵雋賞初何預嗚呼世無賞音兮竟大奇古

柟蒼蒼雲雨垂

秋日過清江傅聘君石溪隱居

有美人如玉招尋故意長山衣猶芟製野飯只菰粱秋
入遙空白霜飛一葉黃年年三徑裏來往有求羊

九江庾樓作

去晉千年後風流尚庾郎地收三楚大天過兩淮長北
望驚塵暗西歸短髮蒼空留江上月夜復照興亡

結架思梁日登臨憶漢年佳遊驚我老孤思為誰牽春

水江湖大夕陽天地偏萋萋青草外何處是秦川

發興

主靜觀心妙耽竒發興長闌邊招翡翠梧下待鸞鳳天
地東風綠江湖西日黃靈脩猶浩蕩誰與玩瓊芳

武昌南樓懷古

青虬修士去逍遙黃鶴飛仙苒苒遊北望日邊秦樹遠
西來雪外蜀江浮吳時宮殿千年夢晉國風塵萬里愁
今古茫茫無限事月明倚遍庾公樓

滕王閣

佩玉鳴鸞一笑空至今華觀疊青穹西山殘雨虹腰白
南浦驕陽鴈背紅幾度登臨添感慨半生漂泊老英雄
檻前猶是唐年水曾見王郎泛短蓬

武昌江漢亭憶南軒

亭下雙來綠玉蚪岷嶓萬里會吳頭江穿南北天心過
漢接東西地脉流水上龍爭方一夢山中鵲起已千秋
張劉精爽知何在安得同來賦遠遊

別鄂倅趙有孚

芙蓉花下把離觴江漢秋生夕漲涼飄裏神駒行地急
超遙仙鶴去天長蜀兵未解星辰赤淮哨將來日月黃
近世平戎無好手請陳上策獻君王

花樹

風吹花樹昨朝紅今日看花樹已空可惜天高花薄命
年年開落只由風

章粲

粲臨江人采之弟

學易齋

天目鑒孤明地籟奠衆響慮淡世欲輕性復道心長斂
襟步前庭手執周易往得知三畫初真契貫穹壤圖原
謂太極圖
書原注書謂通書詣其微精實超惚恍啟蒙析其義端
倪見俯仰九京如可作舍此吾安放

題楊總卿鹿岡庵

客行鹿岡暮四顧秋滿目澗碧煙草滋林黃霜橘熟歸

鳥各東西啼蟹相斷續愁心浩難留故山正幽獨

秋日懷松溪趙宰經父

晴牕靜繙書凝塵掩行迹花影畫簾閒苔痕秋徑寂憑高招遠風緣流委寒碧緘情寄天涯杳杳江閨隔

湖上游鷗寄家兄

花霧壓晴埃柳風蕩暄濁錢塘佳麗地春華大堤曲幽禽築林白野水明湖綠清賞遠難期懷哉美如玉

豫章寄家兄

雨時山色深雨餘山意醒千山萬山間秋風鴈聲冷澄江淨秋思明霞烟秋影遙想大雲心華觴誰與領

春日憶平陽郡博士大雲心兄

東風歸林園雲日斂春事靜觀化道伸良感幽貞利烟芳生暮愁晴絲起新思有酒誰見同惻惻夜亡寐

春日効韋體

新綠灑晴池涓涓泉脉動東風度花稍春音入禽哢而我理羣書朋儔罕迎送翛然愜心期此樂誰能共

豫章宋都官聲父樓上

結架齋峩峩登眺齊近遠江湖萬頃秋風烟四山晚心
賞地曾妍目行天不盡振衣聊消搖開看雲舒卷

詠二疏

人生白駒過世態蒼狗變紛紛慕跖躋寥寥志務卞赫
赫王侯居翕翕富貴戀翠蓋擁游雲朱鞍曜驚電金張
財力豪許史名聲銜滔滔利欲波卓卓見所見長揖萬
乘君玄髮謝朝弁行人相嘆咨羣公遙祖餞高風振朝

野流光照史傳嗟嗟紳縷士來者宜知勸

絜矩書院示學子

四時配四德元亨利與貞天德元最重方春木主生夏
火物暢茂是為德之亨金利秋向實水貞冬實成既貞
又為元循環未嘗停天高而地下陰降復陽升氣理本
同運天人特異名性情節理氣其義明且精元亨利貞
理因時有足徵生長斂藏氣依理常偕行仁禮義知性
之初同聖凡惻隱至羞惡辭讓是非情天人二而一如

射中鵠正柰何天無心人欲易纏縈無心自無妄通復
皆一誠吁嗟其有欲天理隨榛荆殘忍仁斧斤貪冒義
蝗螟禮失之綿蕞知止於挈餅夫人一而二如水分渭
涇大哉古聖人一念天是承仰觀俯以察天降地上騰
夭桃華灼灼好鳥鳴嚶嚶木德自此盛我心惟和平恢
炱行熾景是月陰陽爭天明一暢達朱光布八紘動極
必生靜慎哉柔道乘金行兆新涼宇宙日清冷萬寶就
凝實羣葩委芳菁三陰行肅物戒哉色與聲冬至甲子

夜一葉開堯莫凝陰雖已剥初陽才有萌觀天於閉塞
掩身身欲寧諸君子其來我詩爾其聆子能悟此理見
義自瓏玲子或昧此理見義等聾盲善根有由蘖端緒
微微呈觸物動惻怛致愛先雖要在天元之時春意方
勃興聲身貫律度動作鏘璜珩三十三百儀皦皦朝陽
昇在天亨之時夏氣方敷榮利物合於義秋摶味金腥
貞固守以知冬藏令玄冥一心一太極彼此無損增至
哉子朱子講道于考亭若明通公溥萬古破說鈴仁元

明可配禮亨通可稱義利公所在知貞溥所能若東南
西北隨方有依憑春元東甲乙夏亨南丙丁北貞壬及
癸酉利辛及庚若震離兌坎隨用無變更火則離玄黃
木則震主青秋則兌金說冬則坎水盈四者誠昭昭請
細與君評真精妙凝合我得氣之英所學背斯理南轍
馳幽并當其泉達時浩浩江河傾當其火然時炎炎已
煌熒萌蘖得所養拱把可霄崢富貴真浮雲無為羨金
簾榮華忽飄風無為寵辱驚鳩妖用之媒錢神事之兄

四者苟能充於利必無營厚酒促亡家治容擅傾城四
者苟能充於欲必先懲曉起敞吾門參前倚輿衡晦息
安其身主敬常惺惺勿謂闇室暗間如對日星勿謂閒
居閑凜如警雷霆仁暴判舜桀義利別軻徑存心不以
敬焦火寒凝冰事惟非與是一間谷為陵慎勿思鴻鵠
常期宵螟蛉復坐吾語汝而學發新硎造道有標的求
已見準繩竭力事父母夔夔謹鷄鳴同氣曰兄弟急難
念眷鵠婦道順為正子職孝烝烝友義切以偲詩歌木

丁丁何莫非此德拳拳服諸膺何愧百年身何憮萬物
靈四者誠存存心乎鏤為銘然而仁與義又對立門庭
知者義所藏禮者仁所形猶之四時運陰陽為之經春
夏陽日長秋冬陰日凝又若仁義中仁尤莫與京元猶
五常仁吾因伊川程益信春猶仁通貫如建瓴惟仁為
器重惟知亦不輕守之不以知惟仁莫能勝須知守之
固尤在見之明若夫信猶土是又綱之宏聖門戒去信
重於食與兵四端斯無違一心斯有恒天行以不息異

乎有慾帳日進以無疆同乎一貫曾此為義理源源潔
流乃清精體兮實踐見汝顏之瞳

別楊尊

遠遊同是客執別兩情牽天地愁眉破山林歸夢圓西
行迷蜀道北望黯淮邊馬上封侯事相期在少年

重陽後送謹常兄之符離

嶺外分攜處離觴詰遠途黃花者不足寒鴈去何孤農
圃非吾業衣冠本世儒應當重行止無使世氛汙

敬賦大人竹林真隱之圖

野草閑花競賞音蕭然坐閱歲年深當貞固日知高節
只靜虛中見本心何處乾坤無鳳集他時風雨有龍吟
向來七子皆充隱不止山王累晉林

盛世忠

世忠字景韓清源人有松坡摘藁

胡葦航寄古劍

有人尺錦長安來遠寄寶匣手自開紅雲些氣燦虛室

金
卷十七
鉄中青蛇鱗生苔誠携掌握一揮動瞬息天地興風雷
少年志氣老益壯惟願聖詔下九垓廩中我有汗血馬
與汝直北清氛埃丈夫當為國雪恥笑指經生真不才

柴門

石砌苔初合柴門手自開日催花影轉風遞竹聲來蟹
眼翻茶鼎鵝兒灑酒杯不須憂歲計魁芋已新栽

劉常簿席上

原注慶某
翁八十

近授長生券從天下綺筵潞公專洛日呂望佐姬年坐

語風生舌梳頭雪滿肩上思者舊用飛詔到林泉

觀棋

爭先劉與項得孰楚侵秦本是知心友翻成敵國人運
籌爭刦殺敗局在逡巡袖手旁觀者機深亦損神

送呂東山之清漳

君是純陽派神清性亦真有詩聊遣興無術可醫貧富
貴皆尤物江湖易老人置山錢足矣客路莫因循

寄藏叟僧善珍

訪友南山路橋橫古木陰砌苔無俗跡庭柏是禪心舊
衲連雲補新詩帶月吟同袍嚴戒行別是一叢林

生涯詩

壯歲欲飛騰生涯亦可矜一千餘日戰三十九年僧硯
枕秋風夢書燈夜雨澄儒生貴知命飲水曲吾肱

簡賈戶部

十五年前別相逢各老成舊遊如一夢忽見似重生劇
飲無人敵高談坐客驚諸郎尤可喜事業短燈檠

病起書院偶成

蓄水滋蘭畹開窓近竹林敗糊黃蠟閑斷簡老蟲侵酒
尚欺人病詩能對客吟晨昏一飽足此外不關心

秦竹溪校書清漳未回

茅齋雅稱竹方牀風過疎籬有暗香劇飲一冬成酒病
得閑終日為詩忙新移橘本便霜信貪看梅花倚夕陽
相望故人三百里十宵九夢到清漳

今是行呈劉以道

少年湖海誤加鞭久戍歸歟暫息肩時有故山來夢裏
更無愁緒到鎧邊晨飧全仰數畦菜歲計尤逋二頃田
閑倚瘦筇長嘯處此身疑是結繩前

塞上聞角

刁斗城頭夜月寒一聲嗚咽到江干梅花吹落渾閑事
白首征人淚暗彈

倦妝圖

睡覺春山懶更添起來餘恨鎖眉尖料應春事關心曲

怕見楊花不捲簾

嬾讀書

不弄絲桐不作詩
樂池疊石學兒嬉
少年讀易都忘却
身似羲皇未畫時

王昭君

漢使南歸絕信音
擅庭青草始知春
蛾眉却解安邦國
羞殺麒麟閣上人

程垣

垣宇務實龍巖人

古樂府

長安花如錦不堪製郎衣拾得并州剪剪花花忽飛
清溪彩鴛鴦野性不可馴君心空愛渠渠無愛君心
莫嫌秋後扇明年還六月淒涼暫離別恩情難斷絕

探躋二首

一氣自盤礴萬物自儻忽盤礴運高厚儻忽祝生沒高
厚固冥冥生沒亦汨汨願言握金鏡以祛我之惑

莊周一妄誕丘明一浮夸兩都繡春英三京組朝霞楚
騷哀靈均鵬賦淒長沙律以素王經春蛙與寒鴉

雜興三首

拋拋機中梭婉婉機中淑蘭膏媚鬢蟬筍纖潤紅玉織
成錦繡段光耀綺霞幅世無黃鍾尺何以製華服

青青琅玕竹節直中心虛風月與相忘雪霜不能欺斲
之獻良工堪葺黃金輿悲哉渭水濱空抱歲寒姿
南山有孤松夭矯蒼龍質亭亭聳華蓋清風自永日珍

重棟梁材甘心跔崖石梓匠持規矩大器匪易得

樵家

深溪藏毒蛟樵家永龜口結侶腰彎刀破衲補更厚持
擔俯清流勇往不回首褰裳望青採豈暇尋枯朽

樵叟

蒼蒼雙鬢銀雙鑠不憚勤背曲行步遲徐徐溪水濱羣
兒喧南山踏起南山塵翁跣負薪回換得一壺春

樵子

頭蓬面萎黃身輕步忽遠方斫柴薪回又帶刀斧去戲
笑茅根掘時暫松根踞間道後山歸人尋不知處

樵徑

捫蘿登峻坂不避嵐霾冒拔茅過山陘壯者為前導陰
濕留步跡葉滑無人掃誰言此地幽亦有春風到

樵風

樵夫識雨候風起裝樵歸只顧擔重輕無心問是非纔
觀六鷗退隨知少女機同行採樵人先後不相違

夏日下聞溪渡

溪橋架木度人行人影溪中步步生真水真山皆舊識
時來時去幾關情魚驚鷗立無閑意鳥逐蟬飛有遁聲
暫止筍輿生僕力可人時至午風清



江湖後集卷十四

欽定四庫全書

集部

江湖後集卷十五

詳校官庶吉士臣朱理

助教臣常循覆勘

謄錄監生臣任溥

謄錄副貢生臣杭光晉

欽定四庫全書

江湖後集卷十五

宋 陳起 撰

王志道

志道字希聖義興人有閭風吟藁

題大禹廟

古木夾幽徑森嚴夏禹祠陰雲護陵寢遺廟鎖蛟螭空
石今猶在梅梁事亦奇道人情意厚邀我讀殘碑

和半庵慶成詩韻

重屋祇承敬勿休前星主鬯貳凝旒度筵九尺陳黃目
助祭諸王未白頭精意已知通烈祖儀文元不減圜丘
兩階屢舞苗民格何況金穰歲有秋

賦江湖偉觀

東南王氣萃錢塘襟帶江湖國勢強萬頃煙波流德澤
四時絃管樂豐穰帆歸別浦魚鹽聚雨過平堤草木香
欲賦上林才不逮舉頭三祝壽無疆

簡中朝貴人

場屋辛勤債未償又隨宦轍到河陽米無五斗腰徒折
醋有三升鼻慣嘗屢典朝衣賙過客時沽坊酒滌愁腸
此心對越知無愧午夜爐香乞歲穰

挽趙右司

化瑟初更世道清宗臣只合在朝廷謀猷况已彌台袞
姓字尤當列御屏不向紅雲鳴玉佩却隨丹旐引芻靈
象賢喜有金闈彥全似先生舊典刑

和秋浦聞雞偶成

窗前銀燭焰將暗樓上梅花引已殘忽聽雞鳴思起舞
百年王業尚偏安

日南長至小飲於雙清樓坐客九人皆一時名
勝各和灣字韻詩予亦効顰以謝

一杯春酒對湖山遠勝夷猶綠水間覓句未工天欲暮
碧雲飛滿舍前灣

寄興

五湖深處足逍遙錯把扁舟繫柳條塵世不如煙水闊

笑騎黃鶴上層霄

僑寄山居霍然幾月凡見之於目聞之於耳者
輒綴成絕句名之曰田園雜興非敢比石湖聊
以寫一時閑適之趣云爾

幽居無事屬山家閉却柴門日未斜啼鳥一聲驚夢覺
小窗閑坐聽蜂衙

暮幕黃雲麥壠秋牧童橫笛倒騎牛百金買得葫蘆扇
持向田頭蔽日頭

雨過天青似蔚藍碧雲收入雙魚潭蠶姑舉手交相慶
趨得新晴老却蠶

早蠶上箔將成繭晚界蠶方起大眠兩月辛勤敢胥怨
成絲成絹更成綿

樹頭桑葉似穿錢準擬今年賤似前誰信天公難預料
今年却貴似常年

紡車纔了辦繅車澗水當門足漚麻輸却官租償却債
今年猶剩百斤茶

自從巡尉罷搜茶便覺山中氣象嘉賣得錢來供飽飯
尚餘醉酒插山花

漠漠輕煙護鵲巢楊花無賴蠶天高粼粼白水秧疇滿
省却年時灌溉勞

樵得田頭二麥歸做成餅餌飽妻兒農家喜有耘田本
接到私禾稻熟時

新竹成林猶帶粉早秧出水便成針日長門巷無人過
一覺齁齁夏木陰

和峴窗韻是日也適赴座主西湖社日之讌
雨餘西子濕香腮那得心情滯酒杯浪逐畫舡分社飯
也教人道賞春來

秋早過湖

漠漠輕雲冒兩山樓臺依約有無間畫船未出波光定
一目新鴻度柳灣

和高薄送梅

文如翻水艷天葩始信才猷屬故家為愛新吟貪咀嚼

霜髭撚斷日西斜

多君時送早春葩
不減孤山處士家
留取水窗和月看
夜深踈影正橫斜

標格清奇壓衆葩
數枝頻到士元家
情知老大花應笑
強飲從教醉眼斜

屈曲溪橋路
兩丫淡煙如隔小
櫺紗南枝已入詩人手
三弄從教咽暮笳

遠望青山兩髻丫
水紋風細縞如紗
不知遊冶誰家子

也捲黃蘆學塞笳

花底莓苔蒲樹了翠翹玉珥碧襦紗靚粧雅器鳴琴友
不向朱門聽鼓笳

口占謝高簷送錦薰籠

一種薰籠出錦機殷勤遣送到書幃自慚不是裁花手
沾得仇香香滿衣

和譚雲翔送雙桂韻

雙桂婆娑天上花殷勤分送士元家捷鈴果副聯鵞祝

謁謝當期穀旦差

漁父

岸芷汀蘭曲曲春綠蓑青箬老江濱倚舡三弄東風惡

吹斷巫山片片雲

歲朝轎中伊軋聲類櫓舟因感舊遊

歲朝伊軋上藍輿酷似當年在帝都柔櫓數聲楊柳外
小舟逗曉過西湖

蕭澥

澥字汎之自號金精山民有竹外蛩吟藁按金
精山在贛州寧都縣道書三十五福地也澥蓋
贛之隱者

讀史

雁門翼處不身親成事安知非楚人何事當年良史筆
嗚于一傳著功臣

何事漢庭羞噲伍竟于鐘室起疑猜腰間刀劍少年氣
尚出淮陰跨下來

寫樂府昭君怨後

古今題品幾詞人
莫怨邊風兩鬢塵
不是丹青曾汝誤
琵琶到老一宮嬪

昭君詞

琵琶馬上去
躊躇不是丹青偶
誤渠會得吳宮西子事
漢家此策未全疎

讀秦紀

築了連雲萬里城
春風弦管醉中聽
淒涼六籍寒灰裏

宿得咸陽火一星

讀文君白頭吟

不顧此身輕夜馳
晚年吟苦亦奚為
從來簪折瓶沈事
已在雙鬟暗合時

戲效玉臺體

薄倖拋人輕似梭
憶君還似恨君多
此心至竟真相憶
到得恨時無奈何

題東籬采菊圖

倒樽醉卧菊蘿邊此段風流亦偶然要識先生獨醒處
平生心事在寒泉

江上冬日效石湖田園雜詠體

溪落洲荒水半篙枯楊兩岸冷蕭騷田家預辦來年事
加得陂頭一丈高

睡起

屋外一蟬鳴樹陰矮窗睡起靜沈沈破衣半解斜陽裏
捫得疎時多快心

雪晴

一雪曉來旋放晴瓦溝餘滴響中庭開窗已上三竿日
滿嶺松梢醉未醒

紹定庚寅紀事

民困饑寒為盜賊却從樂處弄干戈大都郡邑初輕視
不剪柔桑煩斧柯

稻梁平地寇難防到處搬為塞上糧路險林深多脫穀
東風綠偃滿山秧

桑柘原頭綠正肥巢林春燕引雛飛前村不復炊煙起
長是清明寒食時

山花依舊發新叢溝澗池塘水自通前日人家無間斷
頽牆破竈草萊中

風動綠林千里亂星垂黑氣萬家災可憐墮在如今劫
人禍天刑先後來

寇中逃山

三三兩兩伏茅茨有事難言只自知心破膽寒無處著

風枝露葉亦驚疑

繞入林巒屏跡時此身自幸少人知
嬰孩底苦不解事偏是怕時方始啼

度九曲嶺

崎嶇石逕起江濱寸步登天苦瘦身行到三義開路口
更從隔嶺問樵人

客中月夜

茅柴白白兩三盃客裏情懷旋旋聞正喜江頭風月好

却緣風月又愁來

題或林尼院壁

剪剪香雲翠影寒更無紅粉舊時痕
祇因曾悟桃花偈

閒却春風夢樂備

提壺

望斷碧雲無白衣一春長是獨醒時
煩君卷舌東風裏
休勸飢人食肉糜

常山舟中

兩岸人家峙兩樓中間一水過行舟倚蓬碎擘桃花片
亂擲江心試急流

還安舟中

亂蟬鳴咽夕陽天楊柳陰中幾客船岸下長江流浩浩
誰知岸上有乾田

過東平悼曾英甫

前時來客此山居同醉梅邊酒幾壺不道後來成死別
影堂吟落一燈孤

韶口山家

茅屋一區山四圍
門前蘋圃帶茭池
兒童似駭儒衣到
兩兩三三壁縫窺

避亂山家

野人生長在高山
道路崎嶇輕往還
長是五更炊未熟
已籠雞鴨送林間

深村林麓冷颼颼
滿眼風光總是愁
日月羨渠雙喜鵲
自跳自擲樹梢頭

亂後過隆教寺

紙窗破碎網蜘蛛古鐵香爐灰半無吟得詩成無筆在
閑尋枯炭壁間書

亂定到邑

蒙蒙野草自榮華破屋夾茅人賣茶滿巷門基帶磚石
有時認得故人家

蕭元之

元之臨江人有鶴皋小藁

塞馬歌答楊侍郎

侍郎贈我六尺駒，矯矯龍性天骨殊。
四蹄鐵立目電閃，此其壯志思長驅。
牽來細觀問廝養，何物有此權奇狀。
為言此是古孫龍，往往得之沙塞上。
森張霧鬢碨礌皴，蕭稍駿尾搖朔風。
冰河蹙裂蹄甲銳，竹批兩耳叢方瞳。
向時淮西屢戰勝，曾駝猛士獻金鐙。
帳前欲得不敢言，空懸寶珠光照乘。
我有百發落雁鉞，前年引滿射赤眉。
功成萬死不見賞，歸騎驢子吟楚詞。
浮沈不作飛騰夢，夢

感公贈我意勤重旋蒙臯比作鞍轡更染青絲結韁鞬
祗今中原刀斗鳴黃沙莽莽白骨腥願公急起掃櫬槍
百萬勲業一旦成我當乘此載前旌男兒報義要輕生

送郡守張宗丞

淮漢秋風起邊聲不可聽九重選良牧內地著郎星土
沃桑麻長城荒草樹青民居多近水一一是江亭
淚落鄉邦事民瘼久未瘳官收隨畝券人上運糧舟冠
起征方急年饑糴未休更聞來取楮何以應需求

本是詩書種躬耕寂寞濱傾家市鞍馬捐命犯風塵幕
府差功級京華困旅貧不如歸去好依舊號詩人

送季庸奉祠歸里

昭代昌文化無人歎陸沈諸公自才傑吾道正山林賦
蓋三年綠滄波萬里心長安豈無路塵起汙瑞簪

別趙李曹

蓮幕皆佳士如君淡素何固空公事少官滿薦書多憂
國闢豐歉籌邊定戰和艱難別知已吾道欲滄波

相別日雖淺相期意獨深那知成遠別何以慰孤吟旅
鴈蘆花浦啼猿楓樹林明朝應此念把酒亦愁心

聞德音入蜀

蜀山萬里外聖主得遙聞歸使愁無路遺黎泣見君千
年文物郡百戰虎狼羣才退慚司馬無因寫檄文

行子

行子家何處征帆楚岸開滄江還幾曲白鳥忽雙來別
酒寒衝醒輕舟浪打回孤懷正牢落更聽暮猿哀

立春日大雪作代簡招友

山意久辭臘林根凍未消清尊如有待白髮正無聊歲
去梅花在春初柳絮飄同吟二三子折簡可能招

西山道中

省得離家日秋風吹我衣客吟詩句贈兒問幾時歸獨
宿孤村館長懷舊竹扉羈愁不堪觸山雨暗斜暉

清明省掃歸舟陸相半

一徑險仍修汎溪去未休薜蘿春暗樹楊柳暮遮樓蕩

漿漁舟駛寒鍾僧寺幽倚蓬賒濁酒猶可洗詩愁

傷廬長史居

昔年傳得文標集每對青燈一起予偶訪袁人尋古事
舊時居處已民居

還西里所居

長恐山林計未成可能俯仰羨公卿鶴閑不受雲拘束
梅冷惟堪雪主盟

北闕無書休悔出東臯有杕可歸耕鏡容漸改驚非昔

猶喜傍人喚後生

南浦泊舟

重來江閣俯滄流一帶西山萬古愁漁叟不知來客意
徑移船過北沙頭

鄧允端

允端字茂初臨江人

涉江采芙蓉

涉江采芙蓉欲采寄所思所思今何在望斷天一涯將

花照秋水秋水清且漪行樂不得再日暮空淒悲

古樂府

梧桐葉落秋容早夜夜寒蛩泣衰草鳳釵金冷鬢雲凋
可惜紅顏鏡中老音塵望斷沈雙鯉喚起相思何日已
瑣窗人靜月輪孤六曲屏山冷如水

過處士山齋

一室蕭疏甚禪床印佛宗樹陰生石蘚茶鼎帶松風去
去水千里行行山幾重佩琴與詩卷回首翠微中

遣興

得志心偏壯謀生事轉疎雨蓑春種藥月案夜抄書窮
達雖同道功名不定居憑誰報消息為問近何如

題社友詩藁

詩裏玄機海樣深散於章句斂於心會時要似庖丁及
妙處應同靖節琴韵勝想君言外得字新令我意邊尋癡
人說夢終難信何日樽前取次吟

秋興

輕煙漠漠鎖晴嵐野水溪邊小駐驂日暮征鴻落何處似將風景過江南

試菱

撥開宿火起爐煙留得餘香伴夜禪落盡碧桃春不管東風却放柳飛綿

徐從善

從善字仲善古括人有月窗摘藁

山中

山中隱計成習慣自無營醉薄人生事貧諳世俗情床
頭惟有易身外不須名千載知吾意無如向子平

呈芸居

生來稽古心文士獨知音世事隨年嬾詩愁入鬢深夢
拋三尺組書敵幾贏金何似謀清隱湖山風月林

趙令尹知常軒

利慾如雲翳碧虛已私克盡始還初人情多向巧中拙
造物偏從密處疏冷筭金多堪作塉極知水到自成渠

作詩曾廣名軒義應記南州孺子徐

題雅溪必種軒

之子風流邁晉人區區凡木肯同群數竿隨寓堪為友
一日豈容無此君鏤月影憐虛處見吟秋聲愛靜中聞
凌霄事業符高趣看取年年長綠雲

題碧雲禪房

我輩偷閒祇暫時買山應負昔年期客因覓句心自語
僧說坐禪寒不知香滯濕雲看穗冷磬隨深澗覺聲遲

小窗風掠梅花落清逐茶煙度竹籬

初春

霜曉初陽潔遊嵐散薄痕夜來殘雪盡新水滿漁村

江上夕思

蘆葦風輕晚色和秋光清潤入漁歌夕陽灔灔長江上
最是歸舟載得多

桃花飄盡悵然有感

東風如幻已飛埃劉阮逡巡去不回惆悵香紅能幾日

又隨流水到蓬萊

書白雲石上

精舍雲深流水遶世事良多松自老山中僧定幾朝昏

門前石逕無人掃

瓜洲別吳菊潭

鄉國無書憶老親昨來邊報不堪聞江頭握手收征淚
不喜留君喜別君

宿山家

好山長向屋頭橫竹建泉聲入甕鳴洗得芋魁留客坐
旋吹竈火點榕明

即事

七十衰翁雪滿頭未談邊事涕先流更言近日無和糴
縱是凶年亦免愁

高吉

吉字樂伯廬陵人有嬾真小集

自序農服先疇之田畝工用高曾之規矩思昔

與李杜論交氣酣懷古歌芒碭之白雲弔梁山
之秋草者非吾家達夫乎受知黃太史而蜀天
巴月之句令人雋永者非吾家子勉乎二公唐
宋詩人冠冕余不肖少駑努力窺遠祖不能見
窗壁歌嗚嗚嗣遺響固不敢不勉今老矣習嬾
成真耽吟成癖深灰撥火心手相應亦足以發
敗囊欲瘦雖多奚為刪其蕪穢姑以藉手見古
人於他日云

江萬里序曰詩本高人逸士為之使王公大人
見為屈膝者而近所見類猥甚不能於科舉者
必曰詩往往持以走謁門戶是反屈膝於王公
大人不暇曾不若俛焉科舉之文猶是出其上
遠甚至以科舉之文出其上是有甚出於所謂
高者之下矣高君幾伯於為詩獨以其能於科
舉者而能焉有子屬丈丈無滯思驚洲之試其
選在三顧容易而居此選哉吾先觀文次觀其

詩也然鷺洲之學專為科舉而父子間其自今
以所講於鷺洲者歸而詠情性真是不知手之
舞之足之蹈之矣時至骨換此一時也吾却當
先觀其詩次觀其文也

有所思

上山采芳桂不盈一掬金金色容易變零落傷我心欲
以遺所思山遙水沈沈微物豈足貴但感歲月深

胡不歸二首

客從暑中來清風入我戶佩帶楚蘭香囊麝湘蘿句一
笑忘形骸百年示肺腑烹鯉喚麌生勞苦竹深處遠游
焉悵悵歸夢應相栩回首白雲飛下有白髮母白髮不
堪剪兒去定何所頻頻占鵲喜噭噭待烏哺去時萱始
華執手淚如雨萱華幾飄風月落啼杜宇

煢煢蕩子妻空房守幽獨纏綿心緒長吞聲忍夜哭背
燈耿孤影香冷雲幙低絕憐屋上鳥替人嗚嗚啼

試長沙胡邦明墨

墨卿遡源流甄陶何遠矣系出五大夫殺身成人美策
勲凌煙閣繇此著姓氏開國從膠東裂土封黑水平生
好太玄握手忘汝爾一笈吐奇芬熏透詩人髓磨礲去
圭角耐久堅莫比朋來自遠方陶泓管城子傳文章心
印千古盡在是我老久絕交未忘抄錄耳種樹書一編
養生論盈紙煩卿為記之歲晚吾事已

秋窗雜興

月朗衆星稀天高萬籟息草露濕秋蟲悲悽聲唧唧隔

窗聽鳴機寒光曙猶織微物固催人尤為貧女惜

塞南

塞南月冷烏夜飛茫茫曠野無枝棲防邊夜歌大風起
鐵衣如冰凍不死功成那忍乞愛卿呌闋已獻龜形綺
錢塘江邊烏欲棲小卿醉軟紅玉肌蟬雲溜簪困未醒
山頭赤鳥啄金餅春宵恨不長如年無情銀漏何濶濶
起來一笈花嫣然

快閣

不跨揚州鶴來尋快閣鷗澄江依舊月落木幾番秋山色橫青眼交情嘆白頭一聲何處笛我欲理歸舟

雨肥

雨肥蔬解甲坡暖竹添丁物態俱自得人癡終不醒獨行寧媿影真嬾遂忘形巢燕歸何晚禁門風為扇

送客之楚

嘶騎隨鞭尾詩囊掛杖頭好風吹客去落日啟予愁沙水寒沅芷邀春醉楚樓故人如問訊雲卧嬾如鷗

憶瀟湘故人

竹好無多箇江清不覺深餘香隨去蝶軟語愛幽禽美景翻成恨經年不寄音長沙一樽酒得共幾回斟

覓桂花

金粟如來佛拈花微笑時煩君修月斧分我占秋枝且約黃香住莫令青女知夜窗清不寐剩讀幾篇詩

庾嶺

庾公陳迹已悠悠春到江南天盡頭依舊冰花照行客

瘴煙原不犯清流

江水悠悠去莫追箇中造道有深機我來豈為觀魚說人笑無鉤釣傍磯

讀淵明傳

誰為栖栖魯孔丘轍環天下果何求愛人學道行吾志束帶何傷見督郵

巫山秀麗為四川之奇觀其一晴

巫峽秋深景最幽山嵐潑翠淡煙浮看來不復成雲雨

空鎖襄王舊日愁

江湖後集卷十五

欽定四庫全書

江湖後集卷十六

宋 陳起 撰

釋圓悟

圓悟閩人

遊清源洞

清旦尋幽洞攀躋有同遊霧雨藏諸峯萬壑響颶颶樹
杪飛磴懸巖外見客舟蘚藤垂翠琰風葉隨清流百丈
崖班駁千尺木聳修鳥啼暘谷曉雲淡海城秋莓苔蝕

丹竈山房花竹幽
踈烟生墟落遠水浮汀洲朝斗空壇
在昇仙往事悠
倚闌吟未就歸屐少遲留

山中四首

飛瀑掛高崖幽禽響虛谷憐此一片景
借得數椽屋澗木卧槎牙巖花散芳馥策杖從所之偶到南山麓
踈林過微雨西嶺收殘暉草露濕我屨松風吹我衣坐
久四山暝吟餘獨鳥飛歸來不知晚蘿月盈牕扉
雅懷無所拘偶行度前峽長松發佳色澄潭閟幽光而

我亦何幸於此得相羊低頭心語口茲遊那可忘
暝色歛平川雲歸日已夕閒行信杖藜倦坐憩苔石花
亦滿意紅草自無心碧吾亦樂吾年人生不滿百

海雲閣

天風來海門驚浪作飛雨岸雲過已盡隴樹青可數掛
帆鷗鳥外清吟正凝佇欲去猶未能漁燈聚烟渚

重遊清源洞

此地今重到藤蘿長碧陰緬思仙去後長有客來吟出

鳥江濤白連雲
嶺樹深杖藜宜少駐
靈跡尚堪尋

小立

小立當清曉
一筇吟影孤
蘭香和霧濕
竹老帶藤枯
野水流將合
春山淡欲無
雨晴猶未卜
勞爾鴉鳩呼

晚渡

橋巷低臨水數家
掩門路窮生寂寞
人渡更黃昏
風色占帆席
潮痕認柳根
岸回林影暝漁火
滿沙村

遊靜真觀

古觀門幽寂來遊亦夙緣林堪巢老鶴壇可禮真仙秋
晚寒生屋雨深苔印磚舊藏多御賜應識尚留傳

題泉州張許祠

泉與睢陽隔事聞猶涕零人雖死忠義祠自活英靈壞
砌寒雲聚空庭古柏青功名見信史何必更碑銘

和胡教授山庵見訪歸韻

因赴山中約歸途帶暝痕禽聲沉衆樹人影背孤村霧
起寒城裏江流古岸根行吟多得句知欲與誰論

大帽山

衆山皆弭伏獨讓此峯尊絕頂時猶雨中林晝亦昏逆
風松勢偃觸石水聲喧定有幽棲者何因得晤言

山中夜歸

一鶴候柴關林空境自閒竹房秋後凍病叟夜深還樹
密疑無路月明猶在山幽居便所適已是十年間

瑞興寺

路僻今蕪翳寒厨尚起烟僧依三佛住門與數峰連雨

潤苔封塔年深竹覆泉創時靈異事猶有斷碑傳

真人洞

搘葛敲幽戶空山得遍觀雲離朝拜石苔積上昇壇秋
晚澗聲溢月明松影寒真人不可遇誰復此燒丹

和黃瑞玉山庵

偶尋孤隱處幽僻遠腥葷結屋聊依石裁松却傍墳山
深長霧雨海近渺風雲不必稱昏曠自然疎見聞

趙山神祠

山中雖隱跡名被世人知無策欲干主有詩還立祠水
雲通別渚枳槲蔭空墀多少能吟者焚香為拂碑

題秦君亭

昔只為吟隱偶然依佛居路逢陰壑盡雲抱曉巖虛亭
在因人重山深與世疎倘懷名利念到此欲何如

承天寺尋勤上人

古寺多陳迹幽花祇自開淨無秋後暑遠絕市中埃苔
色侵碑石松陰蔽月臺山人遲未至欲去重徘徊

次姜秦祠和胡教授韻

曉謁崇祠霧靄深行藏
因識二賢心榻前自有孤忠疏
林下誰賡招隱吟寂寂精廬蒼蘚入堂堂遺像暗塵侵
客中莫致生芻莫聊汲山泉薦菊斟

題寶山寺二首

寓此曾三夏重來隔五年溪山亦良是懷想轉淒然
去臘應差暖今春定有寒澗梅花半樹侵曉又凋殘

宿友人白雲庵三首

不到歲時久重來人事疎掃雲僧亦去誰伴主翁居
萬籟夜俱寂蒲團清可禪林疎窓過月巖遠竹通泉
城裏秋猶熱山中寒已濃紫檀時小炷危坐聽晨鍾

送壁上人歸承天寺

城寺思歸興忽生又携筇杖出雲局月明後夜空山裏
繞屋泉聲只自聽

方海豐詩境樓分賦得春風

暖襲遊人陌上塵不知花信幾番新莫教吹到荼靡處

吹到茶簾是晚春

釋永頤

永頤字山老居唐棲寺有雲泉集按上天竺志
云永頤杭之耆宿也淳祐十年冬十一月聞上
天竺佛光法師以左藏薛師普占解院欲作廳
佛光勿許輒渡江東歸永頤甚高之遺書嘉慰
則永頤之操行亦可知矣

食新茶

自回山中來泉石足幽弄茶經猶掛壁庭草積已衆拜
先俄食新香凝雲乳動心開神宇泰境豁謝幽夢至味
延冥遐靈爽脫塵控靜語生雲雷逸想超鸞鳳飽此巖
壑真清風願遐送

和韓澗泉韻題周晉仙山楹

不翦亦不斷山楹在塵表石泉聲淙淙秀谷自圍繞是
中玄覽人未見今日了君固自無心世亦不易曉夢莫
何可攀纏然泰山小當時巖壑人百世何矯矯清冷振霞

纓日翳羣陰悄

葺唐棲舊廬

矯時無峻節立行虧衆美遠岳憚孤征徘徊就鄉里人情好愉悦我老齊賢鄙媿媿聽鄉言時時容側耳前脩不可見法社漸凋毀名山半征徭祖塔亂獐鹿林築無清資澤居循舊址鑿牖納晴曦蒼竹臨幽此時將了歲寒閉戶春風裏

呂晉叔著作遺新茶

原注其品大窠葉收二餅葉二十七一餅郝原葉仲

原四餅章坂葉二十九二餅碧原王
家二餅大佛嶺游潤四餅凡六家

四葉及王游共家原坂嶺歲摘建溪春爭先取晴景大
窠有壯液所發必奇穎一朝團焙成價與黃金逞呂侯
得鄉人分贈我已幸其贈幾何多六色十五餅每餅包
青翦紅籤纏素繖屑之雲雪輕啜已神魄惺會待佳客
來脩談當晝永

感鴈來紅

落落雲中鴈亭亭階下草草心將變紅鴈聲來已早霜

風日夜催對此忘吾老玲瓏葉數層次第顏色好臘脂
塗盡時倚欄如醉倒年年秋鴈來每被吟情惱

越溪吟

石磊磊猿啾啾越王霸業秋山頭英雄喪盡如何數可
怪猶存浣紗處當時月照清溪頭美人如水逐東流至
今片石終難改千載猶含澤國羞

乾元山洪水

乾元山頭洪水發溪有長蛟潛伺察兩岸居人莫等閒

年深物怪終騰拔
往歲隣封遭水變
只道溪流淨如練
倏忽人煙數里間
夜半平沉皆不見
東南地坼乾坤浮
幾番赤子葵洪流
神龜去後不復返
休看浪打石人頭

苧瀆夜泊

吳城水冷秋風高
迎霜楓葉飄城濠
吳儂趨利如趨市
高帆大艤橫江濤
黃昏不顧風水惡
篙兒怒掣何輕豪
苧瀆人家慣迎接
憧憧來往無停艘
水上懸燈招夜泊
沙頭認客相呼號
人生富貴多不足
亦有裨販當勤勞

萬斛高裝謀重利斗升未給浮輕舠吾生最愛魯仲連
封侯不受海上逃輕世肆志甘貧賤誰能富貴訛辱遭
夜歌新詩喜達旦起看征鴈飛雲臯

野棠

野火回飈掩舊株新叢滿眼臨征途綠攢深棘欲自蔽
千朵萬朵爭敷腴新晴遠客過林坂烟漲吳船春泊晚
冶艷空搖蕩子情繁香暗逐吳姬遠吳姬漂泊行人愁
年年比花開不休半壓壞牆荒館外亂生春蕪野池頭

人間買花貴紈綺一世爭知異朝市曲檻朱闌轉首空
野棠無主自成叢

山行與周弼伯弔同賦野廟

芳草沒荒基終年掩畫扇酒臺乾舊滴香殿入斜暉神
樹枝枝曲山魈個個歸春來歌鼓動野老薦新薇

山池早秋

荷葉傾香露山池見早秋石涼幽蟹過枝脆雨蟬休廢
堰憑虛漲荒泉入亂流水花紅漠漠相對渚煙浮

送僧之金陵

秋針感線蹊雲衲幾回披隴月當牕夜鍾山入句時夢
依紅樹宿寒渡碧江遲吳楚繁幽勝相逢苦未期

月夜遊冷泉亭

地靈泉上寺松壑定深清獨聽子規叫况逢山月明樹
藏春洞黑石擁夜泉鳴日出喧車馬終非隱者情

夜歸

昨夜溪上歸雲下扣松扉老褐啓重鑰瘦厖循我衣院

靜雨聲大氣寒燈暈微叨叨聽林鳥春歇訴無依

徃龍岫舟中

龍山溪上路短棹臘中行雪霽寒郊闊春回宿霧生柳
搖冰線斷鶩起玉衣明未見晴梅發先思杖屨輕

周令自江夏東歸邵溪

芳草萋迷征騎歸且依張負入書惟家園嬾記閑花草
蔬豆重甘舊藿葵崔灝能吟有陳迹禰衡作賦想當時
才能往往為身累好讀淵明飲酒詩

遊何山登道場

中流望極山頭寺
溪午聞鐘泊柳津
春草細靄微雨潤
老松高與碧雲隣
鶴歸烟麓書堂廢
虎去寒巖藓石皴
無奈薄遊歸路晚
水邊風旆濕征塵

雲巖寺

老來好古尚關心
寺裡荒題幾度尋
山鵲報晴窺畫閣
水雞嫌雨上高林
麥殘餘冷收春候
棟落輕風滯晚陰
無限幽懷難具寫
一憑闌罷一閑吟

送王以通之官金陵

芳辰早失意兼哀不擬君來重舉杯雲暗月墻花氣重
蠟殘風幕鳥聲催醉鄉人有江東役乘興船從闕下回
明日沙頭相送罷荼蘂小院獨徘徊

伯符兄弟最英雄千載青山繞故宮宋祖只知曹馬事
齊高還與獍梟同暮簫尚帶蘭陵怨春水多愁舊蠶空
登覽未應迷宿昔夜猿啼在晉時楓

雨牕

江湖春水欲生時
開盡梅花鴈北飛
風雨滿庭人不寐
小牕燈火夜深微

題裴六書堂

數峯相對夕陰遞
新占書堂舊竹斜
地冷石堦秋菊小
一叢開得兩三花

天竺秋日

翠滴千竿濕砌苔
曲廊花木小叢開
吳僧愛覓閑吟處
偷向花邊竹裏來

行繞方池日又斜青雲小注濕秋霞闌干幾度渾敲徧
為引遊魚出浪花

水仙花

洛浦香銷珮解時荊臺歸去峽雲遲綠羅湘帶無心疊
玉墜頭花一半垂

鶯峯

山後山前行徧了倚欄不是動秋吟從頭自較山中石
烟雨苔痕幾片深

苔峰只對堦基列卧榻雲牕烟翠涼老去山中貪勝賞
只應迢遞負三湘

過聚景園

路繞長堤萬柳斜年年春草待香車君王不宴芳春酒
空鎖名園日暮花

看梅雜興

春動晴山照野扉早梅開後失歸期夕陽無奈山郵路
過盡行人雪滿枝

掛頭方帽與烏紗兄自看梅弟煮茶閑問水邊行樂去
向陽渾有幾株花

青松古院一株梅寒殿無人花自開日暮老僧清梵罷
夜深偷照月華來

寄行宮監門王以通

中興天子議攻車歎息諸公屈壯圖行殿不開塵鎖合
至今風雨暗金鋪

玉鈎簾外前朝柳鬪鴨闌邊小艷艷莫道君王不曾問

好收銀鑰護宮花

觀鳥鳶山下藤樹

一株老樹蔽荒村下有藤懸巨蟒身幾度日斜烏鳥散
山昏鬼哭斷行人

游張園觀海棠戲作

春色都將付海棠羣仙會處錦屏張約齋妙出春風手
子美無情為發揚

雪中海棠

蜀妃夜謁紫虛皇玉鳳參差促曉妝謾罷瑤臺魂未醒
臘脂臉上白雲香

聞子規

客情誰是不思歸芳草春深未有期昨夜月明啼更苦

山花滿樹落臘脂

唐樓寺前

唐樓寺前溪水流客帆來往舊杭州津亭樹老無人記
得見幾回僧白頭